

Bautismo di un buki nobo na Papiamento tocante e Faro na Westpunt

WESTPUNT -- Recientemente a tuma luga bautismo di un buki skirbi pa Romulo Fingal. E buki aki ta skirbi na Papiamento y cu yudansa di UNOCA a haya chens di por a publica e buki, pa asina e historia no bay perdi. Ta asina cu Romulo Fingal ta e yiu di e ultimo vuurtorenwachter, di California Lighthouse. E buki aki cu yama "Historia di Faro na Westpunt" ta hopi special, pasobra no tin hopi informacion di e Faro, mientras cu tur aña tin miles di turista ta bishita e Faro aki. Den e buki el a skirbi tocante di e historia di e Faro y tambe por ehempel: con ta pa lanta y biba den un epoca unda transportacion ainda a tuma luga via buri-co, y no tabata tin coriente ni tubo di awa.

E anochi di e bautismo di e buki tabata un anochi hopi agradabel, cu diferente invitadonan special, entre otro Ministro Hooyboer-Winklaar, personal di UNOCA, Archivo

Nacional Aruba, Aruba Tourism, Biblioteca Nacional y Stichting Monumentenfonds Aruba, famia y amigonan. E buki tin dos madrina, esta Sr. Chepita Fingal 89 aña cu ta e unico yiu na bida di e 'vuurtorenwachter' prome cu Sr. Fingal su tata. Tambe Sr. Fingal su ruman muher Lidia ta madrina, cu ta e ruman muher mayor despues cu nan ruman homber Chano a fayece aña pasa. E buki a wordo batisa cu santo di coral di e duinenan tras di e Faro. Sr. Fingal ta hopi orguyoso cu e buki a wordo publica pa asina e storianan nunca mas lo bai perdi y e ta gradici tur hende cu a yud'e, specialmente su casa Femmie Fingal-Leertouwer y su yiunan Richard y Cheryl pa nan pasenshi y ayudo.

E ta dedica e buki na memoria di tur e ciudadanonan di Faro den pasado cu a biba den hopi soledad. Su deseo ta pa e Faro bira un monumento historico oficial, pa asina res-

taur'e y proteha e bunita construcion aki. Cu hopi dolor den su curason e ta wak con e Faro su bunitesa poco poco ta bira menos, pasobra no tin ningun tipo di mantencion riba dje. Dia 23 di september e aña aki, ta cumpli net 100 aña pasa cu a haci e peticion pa construi e 'lady' bunita aki, para firme y silencioso riba su pida baranca den tempo malo y tempo bon. Su deseo ta pa Gobierno di Aruba honra e peticion di Stichting Monumentenfonds Aruba, pa haci e Faro un monumento pa por renob'e, proteh'e y habi'e pa e mercado di turismo y pueblo di Aruba en general. E buki aki lo ta na benta na UNOCA pa solamente Awg. 20; y sigur lo ta hopi interesante pa tur hende cu kier sa mas di e historia di e Faro y di alabes di Aruba su historia. Tambe e buki lo ta perfecto pa mucha si nan ta buscando informacion of material pa traha 'spreekbeurt'. □

